

২২শে শ্রাবণ স্মরণ অনুষ্ঠান — সঞ্চালনার স্ক্রিপ্ট

সঞ্চালক: সম্পিতা ও সাগর মোট সময়: ≈ ২২৩ মিনিট

০ | মঞ্চের আগে (প্রি-শো ঘোষণা)

সম্পিতা:

উপস্থিত সকল দর্শক-শ্রোতাদের কাছে একটি ছোট্ট অনুরোধ—

আর কিছুক্ষণের মধ্যেই শুরু হতে চলেছে আমাদের আজকের অনুষ্ঠান।

তাই আপনারা যদি নিজ নিজ আসনে বসে আমাদের সঙ্গে এই সুন্দর সন্ধ্যাটা উপভোগ করেন,
তাহলে আমাদেরও খুব ভালো লাগবে।

অনুষ্ঠানের একেবারে শুরুতেই আপনাদের কাছে আমাদের একটি আন্তরিক অনুরোধ।
আজকের এই সুন্দর সন্ধ্যায়, এই মঞ্চে এটাই আমাদের প্রথম সঞ্চালনা। তাই কোথাও যদি
কোনো ছোটখাটো ভুল-ত্রুটি হয়ে যায়, আপনাদের সকলের কাছে আন্তরিকভাবে ক্ষমাপ্রার্থী।
আপনাদের ভালোবাসা, উৎসাহ এবং সহযোগিতাই আমাদের এগিয়ে চলার সবচেয়ে বড়
প্রেরণা। আশা করি, আপনারা শেষ পর্যন্ত আমাদের সঙ্গেই থাকবেন। ধন্যবাদ।"

১ | সম্ভাষণ — সম্পিতা ও সাগর

সময়কাল: ১ মিনিট অংশগ্রহণকারী: সম্পিতা ও সাগর

সাগর:

আজ শ্রাবণের আকাশে হয়তো মেঘ জমেছে, হয়তো কোথাও বৃষ্টি নামছে নিঃশব্দে...

আর সেই বৃষ্টির শব্দের আড়ালে, আজও যেন ভেসে আসে এক চিরপরিচিত কণ্ঠ—

“যদি তোর ডাক শুনে কেউ না আসে তবে একলা চলো রে...”

সম্পিতা:

আজ ২২শে শ্রাবণ।

বাঙালির কাছে এই দিনটি শুধুই একটি তারিখ নয়। এ দিন আমাদের স্মৃতির, এ দিন আমাদের বিষাদের, এ দিন আমাদের ভালোবাসার।

কারণ আজকের দিনেই আমাদের ছেড়ে চলে গিয়েছিলেন বাংলা সাহিত্যের আকাশের সেই উজ্জ্বলতম নক্ষত্র— বিশ্বকবি রবীন্দ্রনাথ ঠাকুর।

সাগর:

শ্রাবণ মানেই মেঘ, বৃষ্টি, অপেক্ষা— আর এক অদ্ভুত বিষণ্ণতার আবেশ।

যেন প্রকৃতিও আজ নীরবে স্মরণ করছে সেই মানুষটিকে, যিনি বাংলা ভাষাকে দিয়েছেন নতুন প্রাণ, নতুন সুর, নতুন স্বপ্ন।

সম্পিতা:

২২শে শ্রাবণ আমাদের কাছে কোনো শেষের গল্প নয়। এটি এমন একজন মানুষের কথা মনে করিয়ে দেয়, যিনি চলে গিয়েও থেকে গেছেন।

তঁার গান আমাদের ভোরের প্রার্থনা, তঁার কবিতা আমাদের ভালোবাসার ভাষা, তঁার গল্প আমাদের সমাজের আয়না, আর তঁার দর্শন আমাদের মানবতার পাঠ।

সাগর:

আজকের অনুষ্ঠানের প্রতিটি পরিবেশনা— প্রতিটি গান, প্রতিটি কবিতা, প্রতিটি নৃত্য— হবে বিশ্বকবির প্রতি আমাদের নীরব শ্রদ্ধাঞ্জলি।

আমরা চেষ্টা করব শুধু তঁার সৃষ্টিকে পরিবেশন করতে নয়, তঁার ভাবনাকে অনুভব করতে।

সম্পিতা:

রবীন্দ্রনাথ লিখেছিলেন—

“আছে দুঃখ, আছে মৃত্যু, বিরহদহন লাগে, তবুও শান্তি, তবু আনন্দ, তবু অনন্ত জাগে।”

এই কয়েকটি পংক্তির মধ্যেই যেন লুকিয়ে আছে ২২শে শ্রাবণের প্রকৃত অর্থ।

বিদায় আছে, কিন্তু শেষ নেই।

মানুষ চলে যায়, কিন্তু তাঁর সৃষ্টি সময়কে অতিক্রম করে বেঁচে থাকে।

সাগর:

তাই আজকের এই সন্ধ্যায় আমরা শোককে নয়, স্মৃতিকে বেছে নেব; নীরবতাকে নয়, সৃষ্টির আলোকে বেছে নেব।

কারণ রবীন্দ্রনাথ কোনো একটি দিনের নন— তিনি প্রতিটি ঋতুর, প্রতিটি অনুভূতির, প্রতিটি বাঙালির।

সম্পিতা:

এই অনুভূতিকে সঙ্গে নিয়ে শুরু হচ্ছে আমাদের ২২শে শ্রাবণ স্মরণ অনুষ্ঠান।

সাগর:

আপনাদের সকলকে অনুরোধ করব— শুধু দর্শক হিসেবে নয়, অনুভূতির সহযাত্রী হিসেবে আজকের সন্ধ্যায় আমাদের সঙ্গে থাকার জন্য।

২ | অন্তর মম বিকশিত করে — বঙ্গ ড্রামা কোম্পানি টিম এ ও বঙ্গ ড্রামা কোম্পানি টিম বি

সময়কাল: 5-10 মিনিট অংশগ্রহণকারী: বঙ্গ ড্রামা কোম্পানি টিম এ ও বঙ্গ ড্রামা কোম্পানি টিম বি

সম্পিতা:

সকালবেলার আলোর মাঝে
মলিন যেন না হই লাজে,
আলো যেন পশিতে পায়
মনের মধ্যে একবারে।
বিকাব না, বিকাব না
আপনারে।

আমি বিশ্ব-সাথে রব সহজ
বিশ্বাসে।

সাগর:

রবি ঠাকুরের কথায় ও সুরে, বঙ্গবাডিজের পরিচালক, সদস্য আর আপনাদের সঙ্গে নিয়েই চলুন শুরু করি আজকের এই অনন্য সন্ধ্যা উদ্বোধনী সঙ্গীত ও প্রদীপ প্রজ্জ্বলনের মধ্যে দিয়ে। আসুন তবে, এই শুভক্ষণে প্রদীপ প্রজ্জ্বলনের অংশীদার হই।

[পরিবেশনা]

সম্পিতা:

কী সুন্দর শুরু হলো আমাদের সন্ধ্যা— প্রার্থনার এই সুর যেন আমাদের সবাইকে একটু থামিয়ে দিল। সবাইকে অসংখ্য ধন্যবাদ প্রদীপ প্রজ্জ্বলন পর্বে অংশগ্রহণ করার জন্য।

সাগর:

আয়ুষী দি, তোমাকে কিন্তু আমরা এত সহজে ছেড়ে দিচ্ছি না। মঞ্চ ছেড়ে যাওয়ার আগে তোমাকে একটি ছোট্ট অনুরোধ করব— Bongo Buddies এর Journey কিভাবে শুরু হলো যদি একটু জানাতে।

সাগর:

অসংখ্য ধন্যবাদ আয়ুষী দি কে, এতো সুন্দর একটা বক্তব্য রাখার জন্য।

৬ | আবৃত্তি — “বীরপুরুষ”

সময়কাল: 3-4 মিনিট অংশগ্রহণকারী: সম্পিতা ভট্টাচার্য

সাগর:

এরপর আমরা চলে যাচ্ছি আমাদের মূল পর্বে।

জানো সম্পিতা, আজকের এই প্রার্থনা যেন আমাকে ফিরিয়ে নিয়ে গেল স্কুল জীবনের সেই দিনগুলোতে।

আচ্ছা, তোমার কাছে বাইশে শ্রাবণ মানে কী?

সম্পিতা:

আমার কাছেও বাইশে শ্রাবণ মানেই স্কুল জীবনের অজস্র স্মৃতি। সেই অনুষ্ঠানের প্রস্তুতি, দশ-

বারো দিন আগে থেকেই শুরু হওয়া প্র্যাকটিস, রিহাসাল, আর সবার মধ্যে এক অন্যরকম উচ্ছ্বাস।

আর জানো, আমার প্রথম stage performance কী ছিল?

সাগর:

কী ছিল?

সম্পিতা:

বীরপুরুষ।

সাগর:

আমাদের শোনাবে?

সম্পিতা:

হাঁ, শোনানো যায়

সাগর:

বেশ, তাহলে রবি ঠাকুরের অমর সৃষ্টি ‘বীরপুরুষ’-এর হাত ধরেই শুরু হচ্ছে আমাদের আজকের মূল অনুষ্ঠান।

একটা জোরে করতালি সম্পিতার জন্য।

[আবৃত্তি: বীরপুরুষ]

সাগর:

সত্যিই, অনুষ্ঠানের শুরুটাই যেন নস্টালজিয়ায় ভরে দিলে। তোমাকে অসংখ্য ধন্যবাদ।

৭ | সমবেত নৃত্য — “প্রেমের পরিক্রমা”

সময়কাল: ২০ মিনিট অংশগ্রহণকারী: নৃত্যদল

সাগর:

রবি ঠাকুরের সৃষ্টির এক অনন্য অধ্যায় হলো প্রেম।

আর এই প্রেমকেই অবলম্বন করে আমাদের পরবর্তী নিবেদন— “প্রেমের পরিভ্রমণ”।

সম্পিতা: প্রেমের নানা রূপ, নানা অনুভব ও তার পরিভ্রমণকে নৃত্যের ভাষায় তুলে ধরার এক আন্তরিক প্রয়াসে মঞ্চে স্বাগত জানাই আমাদের রিদম অ্যান্ড রাগা টিম-কে।

৭.১ | উদ্বোধনী নৃত্য — প্রেমের সূচনা

গান: আনন্দধারা বহিছে ভুবনে

সাগর:

নতুন দিনের প্রথম আলোয় লুকিয়ে থাকে যে আনন্দ, সে আনন্দ কেবল পাখির নয়, সে আনন্দ কেবল মানুষের নয়,

সে আনন্দ প্রেমের, সে আনন্দ বেঁচে নেওয়ার, সে আনন্দ চিরায়ত, অনন্ত।

[নৃত্য: আনন্দধারা বহিছে ভুবনে]

৭.২ | প্রেমের জাগরণ

গান: মোর ভাবনারে কী হাওয়ায় মাতালো

সম্পিতা:

শুধু তোমার বাণী নয় গো
হে বন্ধু, হে প্রিয়,
মাঝে মাঝে প্রাণে তোমার
পরশখানি দিয়ে।

যে স্পর্শের অপেক্ষাতে একটা গোটা জীবন কাটিয়ে ফেলে বিনোদিনী, যে কলঙ্ক বুকে নিয়ে একলা একলা গুমরে মরে আশালতা, তার নাম প্রেম, পোষাকি নাম ভালোবাসা।

[নৃত্য: মোর ভাবনারে কী হাওয়ায় মাতালো]

৭.৩ | মিলনের উল্লাস

গান: সুন্দরী রাধে + সাওন গগনে

সাগর:

আমার সকল নিয়ে বসে আছি
সর্বনাশের আশায়।
আমি তার লাগি পথ চেয়ে আছি
পথে যে জন ভাসায় ॥
যে জন দেয় না দেখা যায় যে দেখে
ভালোবাসে আড়াল থেকে,
আমার মন মজেছে সেই গভীরের
গোপন ভালোবাসায় ॥
আমার সকল নিয়ে বসে আছি
সর্বনাশের আশায়।

[নৃত্য: সুন্দরী রাধে + সাওন গগনে]

৭.৪ | অপেক্ষা ও আকাঙ্ক্ষা

গান: দাঁড়িয়ে আছো তুমি আমার গানের ওপারে

সম্প্রতি:

মোর হৃদয়ের গোপন বিজন ঘরে
একেলা রয়েছে নীরব শয়ন- 'পরে--
প্রিয়তম হে, জাগো জাগো জাগো ॥
হৃদয়পাত্র সুধায় পূর্ণ হবে,
তিমির কাঁপবে গভীর আলোর রবে--
প্রিয়তম হে, জাগো জাগো জাগো ॥

[নৃত্য: দাঁড়িয়ে আছো তুমি আমার গানের ওপারে]

৭.৫ | ত্যাগ, না-পাওয়া ও গ্রহণ

গান: কতবারো ভেবেছিঁনু আপনা ভুলিয়া + নয়ন তোমারে পায় না দেখিতে

সাগর:

তোমারেই যেন ভালোবাসিয়াছি
শত রূপে শত বার
জনমে জনমে, যুগে যুগে অনিবার।
তোমারেই যেন ভালোবাসিয়াছি
শত রূপে শত বার।।

[নৃত্য: কতবারো ভেবেছিঁনু আপনা ভুলিয়া + নয়ন তোমারে পায় না দেখিতে]

৭.৬ | আত্মমর্যাদা ও আত্মউপলব্ধি

গান: যদি তোর ডাক শুনে কেউ না আসে

সম্পিতা:

আকাশ তবু সুনীল থাকে,
মধুর ঠেকে ভোরের আলো,
মরণ এলে হঠাৎ দেখি
মরার চেয়ে বাঁচাই ভালো।
যাহার লাগি চক্ষু বুজে
বহিয়ে দিলাম অশ্রুসাগর
তাহারে বাদ দিয়েও দেখি
বিশ্বভুবন মস্ত ডাগর।
মনেরে তাই কহ যে,
ভালো মন্দ যাহাই আসুক
সত্যেরে লও সহজে।

এই সত্যের পথেই তো আমাদের অনন্ত চলা: এক পর্ব থেকে আর এক পর্বে, এক পর্যায় থেকে আর এক পর্যায়। সঙ্গী হয়ে থেকে যান শুধু রবীন্দ্রনাথ।

[নৃত্য: যদি তোর ডাক শুনে কেউ না আসে]

৭.৭ | সমাপ্তি

সাগর:

প্রেমের এই পরিক্রমায় আমরা অনুভব করলাম— আনন্দ, জাগরণ, মিলন, অপেক্ষা, ত্যাগ ও গ্রহণের মধ্য দিয়ে আত্ম-উপলব্ধির এক অনন্য যাত্রা।

সম্পিতা:

যাঁরা এই প্রেমের যাত্রাটাকে শরীরে ঐঁকে দিলেন— আমাদের রিদম অ্যান্ড রাগা টিম, তাদের অসংখ্য ধন্যবাদ। একটু জোরে করতালি দিয়ে তাঁদের আরও উৎসাহিত করি।

৮ | বঙ্গ ড্রামা কোম্পানি Team A পরিবেশনা

সময়কাল: ২০ মিনিট অংশগ্রহণকারী: বঙ্গ ড্রামা কোম্পানি টিম এ

সাগর:

এবার চলে যাচ্ছি আমাদের পরবর্তী অনুষ্ঠানে।

আমাদের পরবর্তী নিবেদন—বঙ্গ ড্রামা কোম্পানির নাট্য পরিবেশনা।

তবে নাটক শুরু করার আগে, বঙ্গ ড্রামা কোম্পানির শুরুর গল্পটা একটু বলি।

আমাদের বঙ্গবাড়ির একটা খুব প্রিয় গ্রুপ আছে—‘গল্পের বুলি’। এই গ্রুপটা কীভাবে তৈরি হল, সেটাও একটা মজার গল্প, সেটা না হয় আরেকদিন বলব।

যাই হোক, গল্পের বুলি থেকে প্রায়ই বেরিয়ে আসে নানারকম গল্প। কেউ নিজের লেখা পোস্ট করেন, কেউ আবার সেই লেখাগুলো পড়ে শোনান। এমনই একদিন গল্পের গাছতলায় সবাই মিলে আড্ডা দিচ্ছিলাম। হঠাৎ একটা Idea Pop out করে, এই গল্পগুলোকে যদি অডিও নাটকের রূপ দেওয়া যায়, তাহলে কেমন হয়?

ব্যাস, সেই ছোট্ট আইডিয়াটাই ধীরে ধীরে বড় হতে শুরু করে। আর আমাদের সকলের প্রিয় শ্রীনীলদার হাত ধরে জন্ম হল বঙ্গ ড্রামা কোম্পানির।

আর আজকের এই নাট্য পরিবেশনা সেই স্বপ্ন আর ভালোবাসারই একটা ছোট্ট ফসল।

তাহলে আর দেরি কেন? ফেরা যাক পরিবেশনায়।

সম্পিতা:

“সভ্যতার প্রদীপ যেথায় জ্বলে, তারই ছায়ায় লুকায় হিংসার কালো অন্ধকার।”

আজও সেই আলো-আঁধারিতে মানুষ খোঁজে শান্তির ঠিকানা। বৈঠকের পর বৈঠক আসে, সিদ্ধান্ত আসে না কভু— শুধু তারিখ বদলায়, বদলায় না নিয়তির লিখন।

সাগর:

এই অনিশ্চয়তা, এই প্রশ্ন, এই দ্বন্দ্ব আর শান্তির অনন্ত অনুসন্ধানের কথাই আজ মঞ্চে জীবন্ত হয়ে উঠবে এক অনন্য নাট্য উপস্থাপনায়।

তাহলে আর অপেক্ষা নয়। জোর করতালির মাধ্যমে মঞ্চে আমন্ত্রণ জানাই আমাদের বঙ্গ ড্রামা কোম্পানি Team A কে। উপভোগ করুন তাঁদের আজকের পরিবেশনা “যুদ্ধের বাজারে শান্তি সম্মেলন”।

[পরিবেশনা]

[বিডিসি টিজার ঘোষণা] (বিডিসি টিজার ঘোষণা — রেশমিদি ও সৈকত)

সম্পিতা:

গল্প যখন মঞ্চে প্রাণ পায়, তখন আমরা শুধু দর্শক থাকি না— একটু একটু করে কাহিনির অংশ হয়ে যাই। বঙ্গ ড্রামা কোম্পানি টিম এ, আপনাদের অনেক অনেক ধন্যবাদ, এই সুন্দর একটি উপস্থাপনার জন্য।

৯ | একক নৃত্য — কাব্যশ্রী

সময়কাল: ৫ মিনিট অংশগ্রহণকারী: কাব্যশ্রী

সম্পিতা:

চলুন আবার ফিরি রবি ঠাকুরের গল্পে।

ঠাকুরবাড়ির ছোট্ট রবির সবচেয়ে কাছের সঙ্গীদের মধ্যে অন্যতম ছিলেন তাঁর বৌঠান, কাদম্বরী দেবী। প্রায় সমবয়সী হওয়ায় তাঁদের সম্পর্ক ছিল অত্যন্ত সহজ, আন্তরিক এবং বন্ধুত্বপূর্ণ। ভানুসিংহের পদাবলী থেকে জল পড়ে পাতা নড়ে- তখন কবির একমাত্র অনুপ্রেরণা তার নূতন বৌঠান। শাসন, স্নেহ, আর বন্ধুত্বের এক অনন্য সম্পর্ক, যেখানে লুকিয়ে রয়েছে এক কবি

আর তার প্রথম পাঠিকার এক অসামান্য মুহূর্তযাপন।

সাগর:

রবীন্দ্রনাথের কাছে প্রেম ছিল না শুধুই দুটি মানুষের আকর্ষণ। তাঁর কাছে প্রেম ছিল বন্ধুত্ব, অপেক্ষা, অভিমান, ফিরে পাওয়া আর হারিয়ে যাওয়ার এক চিরন্তন অনুভব। তাই তাঁর প্রেম পর্যায়ের গানে কখনও ধরা পড়ে প্রথম ভালো লাগার মৃদু স্পন্দন, কখনও বিচ্ছেদের বেদনা, আবার কখনও অনন্ত মিলনের আকাঙ্ক্ষা।

সম্পিতা:

এমনই প্রেম পর্যায়ের কয়েকটি রবীন্দ্রসংগীতের আবহে নৃত্য পরিবেশন করবেন কাব্যশ্রী। জোর করতালির মাধ্যমে মঞ্চে আমন্ত্রণ জানাই কাব্যশ্রীকে।

[নৃত্য]

সাগর:

অসংখ্য ধন্যবাদ কাব্যশ্রীকে, এই অসাধারণ পরিবেশনার জন্য। আরও একবার জোরে করতালি।

১০ | জ্যামিং সেশন — দল

সময়কাল: ৩০ মিনিট অংশগ্রহণকারী: দল

সম্পিতা:

এতক্ষণ আমরা শুনেছি, দেখেছি, অনুভব করেছি— এবার শুধু শোনার পালা নয়। এবার আপনাদের গলা মেলানোর পালা।

সাগর:

কারণ গান তখনই পুরোপুরি বেঁচে ওঠে, যখন মঞ্চ আর দর্শক একসঙ্গে গায়।

তাহলে চলুন কবিগুরুর গানের সুরে সুরে আমরা আপনাদের সঙ্গে করে নিয়ে হাঁটতে শুরু করি শান্তিনিকেতনের পথে— যেখানে লাল মাটির ধুলোয় ভেসে ওঠে গানের হৃদয়, আর বেজে উঠে ভালোবাসার গান।

জোরে করতালি দিয়ে মঞ্চে আমন্ত্রণ জানাই Bongo Jamming Team কে।

[জ্যামিং সেশন — ≈ ৩০ মিনিট]

সাগর:

বাহ! কী Energy ছিল এই আধঘণ্টায়— অসাধারণ এক Performance শুনলাম।

তোমরা শুধু গান পরিবেশন করেনি— তোমরা পুরো সন্ধ্যাটাকে একটা উৎসবে বদলে দিয়েছ। এই Energy, এই আনন্দের জন্য অনেক অনেক ধন্যবাদ Bongo Jamming Team কে।

আর এক দফা জোরে করতালি!

১১ | একক আবৃত্তি — রৌনক

সময়কাল: ৫ মিনিট অংশগ্রহণকারী: রৌনক

সাগর:

এবার একটু স্বাদ বদল, ফিরে আসছি কবিতায়।

সম্পিতা:

একদিন তরীখানা থেমেছিল এই ঘাটে লেগে,
বসন্তের নতুন হাওয়ার বেগে।
তোমরা শুধায়েছিলে মোরে ডাকি
পরিচয় কোনো আছে নাকি,
যাবে কোনখানে।
আমি শুধু বলেছি কে জানে।

সাগর:

তরী তবু থামে, সমস্ত তরীকেই থামতে হয়: জীবনের নিয়মে, সময়ের নিয়মে, নতুনের ডাকে।
তবু, কোনো কোনো তরী নদীর বাঁকে বাঁকে রেখে যায় অনন্তের প্রতীক্ষা। আর এবার সেই
প্রতীক্ষার গল্প শোনাতে মঞ্চ ডেকে নিচ্ছি রৌণককে।

জোরে করতালির মধ্যমে তাঁকে স্বাগত জানাই

[আবৃত্তি: তরীতলা]

সম্পিতা:

আমরা শুনলাম একটি অসাধারণ উপস্থাপনা। কিছু কিছু পরিবেশনা শেষ হওয়ার পর শব্দ নয়, অনুভূতিই কথা বলে। আজকের এই সন্ধ্যাকে এক অন্য রূপ দেবার জন্য। অসংখ্য ধন্যবাদ রৌনকে।

রবি ঠাকুর লিখেছিলেন—

"বিপদে মোরে রক্ষা করো এ নহে মোর প্রার্থনা, বিপদে আমি না যেন করি ভয়।" জীবনের শেষ পর্বে বারবার অসুস্থতা, শারীরিক যন্ত্রণা আর মৃত্যুর মুখোমুখি হয়েও তিনি হার মানেননি। শেষ নিঃশ্বাস পর্যন্ত কলম ছিল তাঁর হাতে, সৃষ্টিই ছিল তাঁর শক্তি।

আজ ২২শে শ্রাবণে আমরা তাঁর প্রয়াণকে শুধুমাত্র শোকের দিন হিসেবে স্মরণ করছি না; স্মরণ করি সেই মানুষটিকে, যিনি শিখিয়েছেন—জীবনের প্রতিটি অন্ধকারকে সাহসের সঙ্গে গ্রহণ করতে, আর প্রতিটি ভোরকে নতুন আশায় বরণ করতে।

দেহের অবসান হয়েছে, কিন্তু তাঁর সৃষ্টির আলো আজও আমাদের পথ দেখায়। সেই আলো কখনও নিভে যাওয়ার নয়।

১২ | বিরতি

সময়কাল: ১৫ মিনিট অংশগ্রহণকারী: —

সাগর:

অনুভূতির এই দীর্ঘ যাত্রায় এবার একটু বিরতি।

স্মৃতিরা থাকুক সঙ্গে, গানের রেশ থাকুক মনে, আর কিছুক্ষণের জন্য শরীরটাকেও একটু বিশ্রাম দিই।

এই বিরতি প্রায় দশ মিনিটের— অনুরোধ, সবাই সুশৃঙ্খলভাবে অংশ নেবেন, আমরা দশ মিনিট পর ফিরে আসছি

সম্পিতা:

আর ইঁা— বিরতির পরের ভাগে একটা ছোট্ট ইঙ্গিত দিই। দ্বিতীয়ার্ধে আমাদের অপেক্ষায় আছে দি ওজি ট্রাফিক জ্যাম, Bongo Drama Company Team B এর নাট্য পরিবেশনা, আরও অনেক কিছু।

সাগর:

তাই একটু বিশ্রাম নিন, জল খান, আমরা দশ মিনিট পর ফিরে আসছি সেরাটা এখনও বাকি।
দশ মিনিট পর আবার দেখা হচ্ছে।

১২ | বিরতির পরে

সময়কাল: ১০ মিনিট অংশগ্রহণকারী: —

দূরে অশথতলায়
পুঁতির কণ্ঠখানি গলায়
বাউল দাঁড়িয়ে কেন আছ?
সামনে আঙিনাতে
তোমার একতারাটি হাতে
তুমি সুর লাগিয়ে নাচ!
পথে করতে খেলা
আমার কখন হল বেল।
আমায় শান্তি দিল তাই।
ইচ্ছে হোথায় নাবি
কিন্তু ঘরে বন্ধ চাবি
আমার বেরোতে পথ নাই।

মধু মাঝির ওই যে নৌকোখানা
বাঁধা আছে রাজগঞ্জের ঘাটে,
কারো কোনো কাজে লাগছে না তো,
বোঝাই করা আছে কেবল পাটে।
আমায় যদি দেয় তারা নৌকাটি
আমি তবে একশোটা দাঁড় আঁটি,
পাল তুলে দিই চারটে পাঁচটা ছটা
মিথ্যে ঘুরে বেড়াই নাকো হাটে।
আমি কেবল যাই একটিবার
সাত সমুদ্র তেরো নদীর পার।

আমাদের ছোটো নদী চলে বাঁকে বাঁকে
বৈশাখ মাসে তার হাঁটু জল থাকে।

পার হয়ে যায় গোরু, পার হয় গাড়ি,
দুই ধার উঁচু তার, ঢালু তার পাড়ি।

চিক্ চিক্ করে বালি, কোথা নাই কাদা,
একধারে কাশবন ফুলে ফুলে সাদা।

আমি যদি দুষ্টুমি ক'রে
চাপার গাছে চাপা হয়ে ফুটি,

ভোরের বেলা মা গো, ডালের 'পরে
কচি পাতায় করি লুটোপুটি,

তবে তুমি আমার কাছে হারো,
তখন কি মা চিনতে আমায় পারো।

তুমি ডাক, "খোকা কোথায় ওরে।"
আমি শুধু হাসি চুপটি করে।

১৩ | একক সংগীত — মীনাক্ষী

সময়কাল: ১০ মিনিট অংশগ্রহণকারী: মীনাক্ষী

সম্প্রতি:

কি কিছুক্ষণের জন্য ছোট বেলায় ফিরে গিয়েছিলেন তাই তো?

আর সেই ছোটবেলার পথ ধরে হাঁটতে হাঁটতে একদিন আমরা পৌঁছে যাই শিলাইদহের
আদিগন্ত ধানক্ষেতে। যেখানে পদ্মার বুকে ভেসে চলেছে রবি ঠাকুরের বজরা, দুধারের
বালিয়াড়িতে বাউলের ক্ষ্যাপা পায়ে তখন সহজ ভাবে বেঁচে নেওয়ার অন্যরকম সুর। হঠাৎ
একদিন জমিদার রবীন্দ্রনাথ আর প্রেমিক রবির দেখা হয়ে যায় সেই মোহনার ধারে, রাত্রির
অনন্ত গভীরে জেগে ওঠে-

তাই তোমার আনন্দ আমার পর
তুমি তাই এসেছো নিজে
আমায় নইলে ত্রিভুবনেশ্বর
তোমার গান হত যে মিছে।

সাগর:

তাই আজকের আমাদের পরবর্তী উপস্থাপনা, রবীন্দ্রনাথের বাউলাঙ্গের সঙ্গীত পরিবেশনা, যেখানে পদ্মার হাওয়ায় ভেসে আসা সুরের উত্তরাধিকার বহন করবেন আপনারাও।

চলুন, শুনে নেওয়া যাক পরবর্তী সঙ্গীত উপস্থাপনা।

[সংগীত]

সাগর:

বিরতির পর সুর এভাবে ফিরে এলে মনটা যেন আবার ভরে ওঠে। মীনাক্ষী, আপনার কণ্ঠস্বর আজকের সন্ধ্যায় একটু নরম আলো এনে দিয়েছে। অনেক ধন্যবাদ।

১৪ | বঙ্গ ড্রামা কোম্পানি টিম বি — “কবির সন্মানে কয়েকজন”

সময়কাল: ২০ মিনিট অংশগ্রহণকারী: বঙ্গ ড্রামা কোম্পানি টিম বি

সাগর:

আচ্ছা সম্পিতা, এই শ্রাবনের সন্ধ্যায় কোনো গল্প মনে পড়ে তোমার?

সম্পিতা:

হুম গল্প, কতগুলো মানুষ। কতগুলো ভাঙাচোরা জীবন।

ভালোবাসা, বিরহ, মান-অভিমান, স্বপ্ন আর অপূর্ণতার গল্প।

আর তাদের মাঝখানে—একটি ছোট্ট ক্যাফে। সেখানে প্রতিদিন জমে ওঠে জীবনের হিসেব-নিকেশ।

সাগর:

তারা কি শেষ পর্যন্ত খুঁজে পাবে নিজেদের? নাকি হারিয়ে যাবে সময়ের চোরাবালিতে?

সম্পিতা:

উত্তরটা লুকিয়ে থাকুক অমলতাসের হলুদ ফুলে আর শ্রাবণের মেঘলা আকাশে।

এবার মঞ্চে আসছে বঙ্গ ড্রামা কোম্পানি টিম বি— তাঁদের নাট্যনিবেদন “কবির সন্মানে কয়েকজন” নিয়ে।

করতালিতে তাঁদের স্বাগত জানাই।

[নাটক: কবির সন্মানে কয়েকজন]

সাগর:

ক্যাফের সেই হিসেব-নিকেশ যেন আমাদেরও একটু থামিয়ে দিল। বঙ্গ ড্রামা কোম্পানি টিম বি কে, অসংখ্য ধন্যবাদ এমন একটি অবধুপূর্ব নাট্য উপস্থাপনার জন্য।

একটা জোরে করতালি।

১৫ | নৃত্য — সুবর্ণা রায়চৌধুরী, তোর্সা, স্যালভিয়া

সময়কাল: ৫ মিনিট অংশগ্রহণকারী:

সম্প্রতি:

জোড়াসাঁকোর ছোট্ট রবির দিন কাটতো জানলার গরাদের ওপারে বসে অথবা তেতলার ঘরে নূতন বৌঠানের সাথে। এমনই এক বৃষ্টিধোয়া কলকাতার বিষম দুপুরে যখন গোটা জোড়াসাঁকো বাড়িতে দুপুরের নিস্তরঙ্গ নীরবতা, কিশোর রবিকে ছুঁয়ে গেল বৈষ্ণব পদাবলীর ভানুসিংহ। শ্রীমতি রাধিকার অভিমান আর ভানুসিংহের হৃদয়ে তখন দুপুরের গোখুলি। নতুন স্নেটে নূতন বৌঠানের জন্য নতুন উপহার

গহন কুসুম কুঞ্জ মাঝে

[নৃত্য]

সাগর:

রবীন্দ্রনাথের মতে, শৈশবের সবচেয়ে আপন ঋতু ছিল বর্ষা—যে ঋতু মানুষকে ঘরের আরও কাছাকাছি নিয়ে আসে। বৃষ্টিভেজা দিন, ঘরের মায়া, প্রকৃতির অপার টান, মেঘের গর্জন, বৃষ্টির ছন্দ আর হৃদয়ের ডাক যখন একাকার হয়ে যায়, তখনই যেন মনে ভেসে ওঠে ভানুসিংহের সেই চিরসবুজ গান—

“মেঘ বলেছে যাব যাব...”

[নৃত্য]

সম্পিতা:

জানালায় গরাদই হয়ে উঠেছিল ছোট্ট রবির প্রথম পৃথিবী দেখার জানালা। জানালার ওপারে একটি পুকুর, তার ধারে একটা প্রাচীন বটগাছ, আর বর্ষার দিনে টুপটাপ বৃষ্টির সুর—এই ছিল ছোট্ট রবির শৈশবের আপন জগৎ।

ঘণ্টার পর ঘণ্টা সে মুগ্ধ হয়ে তাকিয়ে থাকতো বৃষ্টির ঝরে পরা ফোঁটাগুলোর দিকে, কান পাততো পাতার টুপটাপ শব্দে। পুকুরের ওপারে ছিল এক বিশাল বটগাছ। তার ঝুরি নেমে এসেছে এমনভাবে, যেন অগণিত দৈত্য নীরবে পাহারা দিচ্ছে। লেখক রবীন্দ্রনাথ কিন্তু কখনোই ভোলেননি তার এই প্রথম বন্ধুকে।

“নিশিদিশি দাঁড়িয়ে আছো মাথায় লয়ে জট, ছোটো ছেলেটি কি মনে কী পড়ে, ওগো প্রাচীন বট?”

মুক্তির আনন্দ, বর্ষার আমন্ত্রণ আর প্রকৃতির অব্যাহত আশ্বাসে সাড়া দিয়ে একদিন তিনি লিখে ফেললেন মেঘেদের জন্য এক অনন্তের চিঠি।

মন মোর মেঘের সঙ্গী”।

[নৃত্য]

সাগর:

বর্ষা, জোড়াসাঁকো, রবীন্দ্রনাথ, আর এই ব্যাঙ্গালোর শহর- সবকিছুকে একসূত্রে গেঁথে দিল যারা সেই সুবর্ণা, তোর্সা, আর স্যালভিয়াকে আমাদের অসংখ্য ধন্যবাদ।

১৮ | ?? | দর্শক-আকর্ষণ পর্ব — অ্যাডমিনবৃন্দ

নোট: থিম সং প্রকাশ (আয়ুষ্সিদি), বিশেষ অতিথি আহ্বান

সময়কাল: ১০ মিনিট অংশগ্রহণকারী: অ্যাডমিনবৃন্দ

সম্পিতা:

এতক্ষণ আপনারা ছিলেন আমাদের অনুভূতির সঙ্গী।

এবার আপনাদের সক্রিয় অংশগ্রহণ ছাড়া এই সন্ধ্যা সম্পূর্ণ হবে না।

সাগর:

রবীন্দ্রনাথ আমাদের শিখিয়েছেন— জীবন মানেই মিলন, জীবন মানেই অংশগ্রহণ।

তাই এবার আমাদের অ্যাডমিনরা নিয়ে আসছেন দর্শকদের জন্য এক বিশেষ আকর্ষণীয় পর্ব।

[দর্শক-আকর্ষণ পর্ব]

সম্প্রতি:

এতক্ষণ আপনারা শুনছিলেন— এবার নিজেরাই যেন অনুষ্ঠানের অংশ হয়ে উঠলেন। অ্যাডমিনদের ধন্যবাদ এই আনন্দের সুযোগটা এনে দেওয়ার জন্য, আর যারা এগিয়ে এসেছিলেন— আপনাদেরও।

১৯ | পুরস্কার বিতরণ

সময়কাল: ১০ মিনিট অংশগ্রহণকারী: আয়োজক কমিটি

বিজয়ীদের তালিকা (বিভাগ, নাম), অংশগ্রহণকারী।

[পুরস্কার বিতরণ]

২১ | ব্যান্ড পরিবেশনা — দি ওজি ট্রাফিক জ্যাম

সময়কাল: ৩০ মিনিট অংশগ্রহণকারী: দি ওজি ট্রাফিক জ্যাম

সাগর:

ঠিক আছে সবাই— এতক্ষণ ধরে যে অপেক্ষাটা জমিয়ে রেখেছিলেন, এবার তার সময়।

সন্ধ্যার শেষে আমরা যাঁদের জন্য বসেছিলাম— আমাদের নিজেদের ব্যান্ড, দি ওজি ট্রাফিক জ্যাম— যাঁদের ট্রাফিক জ্যাম-এ একবার আটকে পড়লে আর ছাড়া নেই। এবার তাঁরাই মঞ্চে আসছেন।

সম্পিতা:

আমাদের বিশেষ পরিবেশনা— দি ওজি ট্রাফিক জ্যাম!

পরের ত্রিশ মিনিট কোনো শান্ত বসার পালা নয়। এখানে গান থাকবে, তাল থাকবে, আর আপনাদের গলা, তালি, আর শক্তি— সব লাগবে।

সম্পিতা:

তাই এবার চেয়ার ছেড়ে একটু প্রাণ খুলে দিন। জোরে করতালি দিয়ে মঞ্চে ডাকি— দি ওজি ট্রাফিক জ্যাম!

[দি ওজি ট্রাফিক জ্যাম — $\approx$ ৩০ মিনিট]

সাগর:

বাহুহু! এটাই বাকি ছিল— বেঙ্গালোরের ট্রাফিক জ্যাম এমন হলে, সারা জীবন এখানেই আটকে থাকার ইচ্ছা হয়। যাই হোক, একটা অসাধারণ উপস্থাপনা দেখলাম ট্রাফিক জ্যামের তরফ থেকে।

সম্পিতা:

আমি তো স্তব্ধ— কেমন লাগলো সবার? এখনো শক্তি আছে? আছে? বেশ, ওটা খাবারের জন্য বাঁচিয়ে রাখি? এরপর কিন্তু ভুরিভোজ আছে...

সাগর:

বেশ, আর বিলম্ব না করে এক দফা আরও করতালি দিয়ে বিদায় জানাবো ট্রাফিক জ্যামকে! ট্রাফিক জ্যাম— আপনারা অসাধারণ!

২২ | কৃতজ্ঞতা জ্ঞাপন — আয়োজক কমিটি

সময়কাল: ৫ মিনিট অংশগ্রহণকারী: আয়োজক কমিটি

সম্পিতা:

প্রতিটি সুন্দর অনুষ্ঠানের পেছনে থাকে বহু মানুষের নীরব পরিশ্রম।

যাঁরা মঞ্চ সাজিয়েছেন, যাঁরা আলো-সাইড সামলেছেন, যাঁরা শিল্পীদের পাশে থেকেছেন, যাঁরা

এই সন্ধ্যাকে নিজেদের বলে ভেবেছেন— তাঁদের প্রতি আমাদের অন্তরের কৃতজ্ঞতা।

সাগর:

কৃতজ্ঞতা জ্ঞাপনের জন্য মঞ্চে আহ্বান জানাই আমাদের আয়োজক কমিটিকে।

[কৃতজ্ঞতা জ্ঞাপন]

সমাপ্তি ঘোষণা

সাগর:

আজকের এই সন্ধ্যা শেষ হচ্ছে, কিন্তু রবীন্দ্রনাথকে স্মরণ করার কোনো শেষ নেই।

সম্পিতা:

তিনি থাকবেন ভোরের গানে, বর্ষার বৃষ্টিতে, প্রিয় মানুষের অপেক্ষায়, আর আমাদের প্রতিটি বাঙালি হৃদয়ে।

সাগর:

"শেষ নাহি যে, শেষ কথা কে বলবে..."

সম্পিতা:

২২শে শ্রাবণের এই স্মরণসন্ধ্যায় আমাদের সঙ্গে থাকার জন্য আপনাদের সকলকে জানাই আন্তরিক ধন্যবাদ।

উভয়ে:

নমস্কার। শুভরাত্রি